Le Lais

François Villon

Table of Contents

Le	Lais	1
	François Villon	
	<u>I</u>	
	<u></u>	
	<u></u>	
	<u>VI</u>	
	<u>VII</u>	
	VIII	
	IX.	
	<u>X</u>	
	XI.	
	XII	
	XIII	
	XIV.	
	XV.	
	<u>XVI</u>	
	XVII	
	XVIII	
	XIX	
	XX	
	XXI	
	XXII	
	XXIII	
	XXIV	
	XXV	
	XXVI	
	XXVII	
	XXVIII	
	XXIX	
	XXX	
	XXXI	
	XXXII	
	XXXIII	
	XXXIV.	
	XXXV	
	XXXVI	
	XXXVII.	
	XXXVII	
	XXXIX	
	XL.	
	<u>/ 11_</u>	1

Le Lais

François Villon

This page copyright © 2001 Blackmask Online.

http://www.blackmask.com

- <u>I</u>
- <u>II</u>
- <u>Ⅲ</u>
- <u>IV</u>
- <u>V</u>
- <u>VI</u>
- <u>VII</u>
- <u>VIII</u>
- <u>IX</u>
- <u>X</u>
- <u>XI</u>
- <u>XII</u>
- <u>XIII</u>
- <u>XIV</u>
- <u>XV</u>
- <u>XVI</u>
- XVII
- XVIII
- <u>XIX</u>
- <u>XX</u>
- <u>XXI</u>
- <u>XXII</u>
- XXIII
- XXIV
- <u>XXV</u>
- XXVI
- XXVII
- XXVIII
- XXIX
- <u>XXX</u>
- XXXI
- XXXII
- XXXIII
- XXXIV
- <u>XXXV</u>
- XXXVI
- XXXVII
- XXXVIII
- XXXIX
- <u>XL</u>

I

L'an quatre cens cinquante six, Je, Françoy Villon, escollier, Considerant, de sens rassis, Le frain aux dens, franc au collier, Qu'on doit ses euvres conseillier, Comme Vegece le racompte, Sage Rommain, grant conseillier, Ou autrement on se mescompte...

Ш

En ce temps que j'ay dit devant, Sur Noël, morte saison, Que les loups se vivent du vent Et qu'on se tient en sa maison, pour le frimas, pres du tyson, Me vint ung vouloir de briser La tres amoureuse prison Qui faisoit mon cueur debriser.

Ш

Je le feiz en telle façon,
Voyant celle devant mes yeult
Consentant a ma deffaçon,
Sans ce que ja luy en fust mieulx;
Dont je me dueil et plains aux cieulx,
En requerant d'elle vengance
A tous les dieux venerïeux,
Et du grief d'amours allegence.

IV

Et se j'ay prins en ma faveur Ces doulx regars et beaux semblans De tres decevante saveur Me tresparsans jusques aux flans, Bien ils ont vers moy les piés blancs Et me faillent au grant besoing : Planter me fault aultres complans Et frapper en ung aultre coing.

٧

Le regard de celle m'apris qui m'a esté fellone et dur ; Sans ce qu'en riens j'aye mesprins, Veult et ordonne que j'endure La mort, et que plus je ne dure. Si n'y vois secours que fouïr ; Rompre veult la vive soudure Sans mes pitieux regrets ouïr.

VI

Pour obvier a ses dangiers, Mon mieulx est, ce croy, de partir. A Dieu! Je m'en vois a Angers, Puis qu'el ne me veult impartir Sa grace ne me departir. Par elle meurs, les membres sains; Au fort, je suys amant martir, Du nombre des amoureux sains.

VII

Combien que le depart me soit Dur, si fault il que je l'eslongne; Comme mon povre sens consoit, Aultre que moy est en quelongne, Dont oncques soret de Boulongne Ne fut plus alteré d'humeur. C'est pour moy piteuse besongne: Dieu en vueille ouÿr ma clameur!

VIII

Et puys que departir me fault Et du retour ne suis certain (Je ne suis homme sans deffault, Ne qu'aultre d'assier ne d'estain ; Vivre aux humains est incertain Et aprés mort n'y a relaiz) Je m'en vois en pays lointain, Si establit ce present laiz.

IX

Premierement, ou nom du Pere, Du Filz et Saint Esperit, Et de sa glorïeuse Mere Par qui grace riens ne perit, Je laisse, de par Dieu, mon bruyt A maistre Guillaume Villon, Qui en l'onneur de son nom bruyt, Mes tentes et mon pavillon.

X

Item, a celle que j'ay dit Qui si durement m'a chassé Que je suis de joye interdit Et de tout plaisir dechassé, Je laisse mon cueur enchassé, Palle, pitieux, mort et transy. Elle m'a ce mal pourchassé, Mais Dieu luy en face mercy!

ΧI

Item, a maistre Ythier Merchant, Auquel je me sens tres tenu, Laisse mon branc d'acier tranchant, Et a maistre Jehan le Cornu, Qui est en gaige detenu Pour ung escot sept solz montant; Je veul, selon le contenu, Qu'on leur livre... en le rachetant!

XII

Item, je laisse a Sainct Amant Le Cheval blanc avec la Mule, Et a Blaru mon dÿamant Et l'Asne royé qui reculle. Et le decret qui articulle Omnis utriusque sexus Contre la Carmeliste bulle Laisse aux curés, pour mettre sus.

XIII

Et a maistre Robert Valee, Povre clergot en Parlement, Qui n'entend ne mont ne valee, J'ordonne principalement Qu'on luy baille legierement Mes brayes, estans aux Trumillieres, Pour coyffer plus honnestement S'amye Jehanne de Milliers.

XIV

Pour ce qu'il est de lieu honneste Fault qu'il soit mieulx recompensé, Car le Saint Esperit l'adomoneste, Obstant ce qu'il est insensé. Pour ce, je me suis pourpensé, Puis qu'il n'a sens ne qu'une aulmoire, A recouvrer sur Mau pensé, Qu'on lui baille, l'Art de memoire.

XV

Item, pour assigner la vie Du dessus dit maitre Robert, Pour Dieu, n'y aiés point d'envye, Mes parents, vendés mon haubert, Et que l'argent, ou la plus part, Soit emploié, dedans ces Pasques A acheter a ce poupart Une fenestre emprés Saint Jacques.

XVI

Item, laisse et donne en pur don Mes gans et ma houcque de soye A mon amy Jacques Cardon, Le glan aussi d'une saulsoye, Et tous les jours une grasse oye Et ung chappon de haule gresse, Dix muys de vin blanc comme croye, Et deux procés, que trop n'engresse.

5

XVII

Item, je lessë a noble homme Regnier de Montigny, trois chiens; Aussi a Jehan Raguier la somme De cent frans prins sur tous mes biens; Mais quoy? Je n'y comprens en riens Ce que je pourray acquerir: L'en ne doit trop prendre des siens, Ne ses amys trop surquerir.

XVIII

Item, au seigneur de Grigny
Laisse la garde de Nygon
Et six chiens plus qu'a Montigny,
Vicestre, chastel et donjon;
Et a ce malostre changon,
Moutonnier, qui le tient en procés,
Laisse troys coups d'ung escourgon
Et coucher paix et aise es ceps.

XIX

Item, au Chevalier du guet, Le Hëaulme luy establis, Et aux pietons qui vont d'aguet Tastonnant par ces establis, Je leur laissë ung beau riblis, La Lanterne a la Pierre au Let, Voire, mes j'aray les Troys Lis, S'ilz me mainent en Chastellet.

XX

Et a maistre Jaques Raguier
Laisse l'Abeuvroir Popin,
Paiches, poires sucré, figuier—,
Tous jours le choiz d'ung bon loppin,
Le trou de la Pomme de Pin,
Cloz et couvert, au feu la plante,
Emmailloté en jacopin,
Et qui vouldra planter si plante!

XVII 6

XXI

Item, a maistre Jehan Mautaint Et maistre Pierre Basannier, Le gré du seigneur qui attainct Troubles, forfaiz, sans espargnier; Et a mon procureur Fournier, Bonnetz cours, chausses semelees, Taillees sur mon cordouennier, Pour porter durant ces gelees.

XXII

Item, a Jehan Trouvé, boucher,
Laisse le Mouton franc et tendre,
Et ung tacon pour esmouchier
Le Beuf Couronné qu'on veult vendre,
Et la Vache, qui pourra prendre
Le vilain qui la trousse au col:
S'il ne la rend, qu'on le puist pendre
Et estrangler d'un bon licol!

XXIII

Item, a Perrenet Merchant, Qu'on dit le Bastard de la Barre, Pour ce qu'il est ung bon merchant, Luy laisse trois gluyons de feurre Pour estendre dessus la terre A faire l'amoureux mestier, Ou il luy fauldra sa vie querre, Car il ne scet autre mestier.

XXIV

Item, au Loup et a Cholet
Je laisse a la fois ung canart
Prins sur les murs comme on souloit,
Envers les fossés, sur le tart,
Et a chascun ung grant tabart
De cordelier jusques aux piez,
Busche, charbon et poys au lart,
Et mes houseaulx sans avantpiez.

XXV

Item, je laissë, en pitié
A trois petis enffans tous nudz
Nommés en ce present traictié,
Povres orphelins impourveuz,
Tous deschaussez, tous despourveuz,
Et desnuez comme le ver
(J'ordonne qu'ilz seront pourveuz,
Au moins pour passer cest yver),

XXVI

Premierement, Colin Laurens, Girard Gossouïn, Jehan Marceau, Desprins de biens et de parens, Qui n'ont vaillant l'anse d'un seau, Chascun de mes biens ung fesseau Ou quatre blans, s'ilz l'aiment mieulx; Ilz mengeront maint bon morceau, Les enffans, quand je seray vieulx.

XXVII

Item, ma nominacion, Que j'ay de l'Université, Laisse par resignacion, Pour seclurre d'aversité Povres clers de cest cité Soubz cest intendit contenus ; Charité m'y a incité Et Nature, les voyans nudz.

XXVIII

C'est maistre Guillaume Cottin
Et maistre Thibault de Vittry,
Deux povres clers parlans latin,
Humbles, biens chantans au lectry,
Paisibles enffans sans estry:
Je leur laisse sans recevoir
Sur la maison Guillot Gueutry,
En attendant de mieulx avoir.

XXIX

Item, et j'adjoinctz a la crosse Celle de la rue Saint Anthoine, Ou ung billart de quoy on crosse, Et tous les jours plain pot de Seine Aux pigons qui sont en l'essoyne, Ensserés soubz trappe voliere, Mon miroüer bel et ydoyne Et la grace de la geolliere.

XXX

Item, je laisse aux hospitaux Mes chassis tissus d'arignie, Et aux gisans soubz les estaulx, Chascun sur l'eul une grognee, Trambler a chiere renfrongnee, Megres, velus et morfondus, Chausses courts, robe rongnee, Gelez, murdriz et enfondus.

XXXI

Item, je laisse a mon barbier
Les rongnures de mes cheveux,
Plainement et sans destourbier;
Au savetier mes souliers vieulx,
Et au freppier mes habitz tieulx
Que quant du tout je les delaisse;
Pour mains qu'ilz ne cousterent neufz
Charitablement je leur laisse.

XXXII

Item, je laisse aux Mendïans, Aux Filles Dieu et aux Beguines, Savoureux morceaulx et fryans, Chappons, flaons, grasses gelines, Et puis prescher les .XV. signes Et abatre pain a deux mains. Carmes chevauchent noz voisines, Mais cela, ce n'est que du mains.

XXXIII

Item, laisse le Mortier d'or A Jehan, l'espicier, de la Garde, Une potence de sainct Mor, Pour faire ung broyer a moustarde. Et celluy qui fist l'avantgarde Pour faire sur moy griefz exploiz : De par moy, saint Anthoine l'arde! Je ne luy feray autre laiz.

XXXIV

Item, je lesse a Mirebeuf
Et a Nicolas de Louviers,
A chacun l'escaille d'un oeuf
Plaine de francs et d'escus vieulx.
Quant au concierge de Gouvieulx,
Pierre de Rousseville, ordonne,
Pour le donner entendre mieulx,
Escus telz que le Prince donne.

XXXV

Finablement, en escripvant, Ce soir, seulet, estant en bonne, Dictant ces laiz et descripvant, J'ouys la cloche de Serbonne, Qui tous jours a neuf heures sonne Le salut que l'ange predit; Si suspendis et mis en bonne Pour prier comme le cueur dit.

XXXVI

Ce faisant, je m'entroubliay, Non pas par force de vin boire, Mon esperit comme lÿé. Lors je sentis dame Memoire Reprendre et mectre en son aulmoire Ses especes colaterales, Oppinative faulse et voire Et autres intellectualles,

XXXIII 10

XXXVII

Et meismement l'estimative,
Par quoy prospective nous vient,
Simulative, formative,
Desquelles souvent il advient
Que, par leur trouble, homme devient
Fol et lunatique par moys;
Je l'ay leu, se bien m'en souvient, En Aristote aucunesfois.

XXXVIII

Dont le sensitif s'esvailla Et esvertua Fantaisie, Qui les organes resveilla, Et tint la souveraine partie En suspens et comme mortie Par oppressïon d'oubliance, Qui en moy s'estoit espartie Pour monstrer de Sens la lïance.

XXXXIX

Puis que mon sens fut a repos Et l'entendement desmellé, Je cuiday finer mon propos, Mais mon ancrë trouvay gelé Et mon cierge trouvay soufflé; De feu je n'eusse peu finer, Si m'endormis, tout enmouflé, Et ne peuz autrement finer.

XL

Fait au temps de ladite datte Par le bien renommé Villon, Qui ne mengue figue ne datte, Sec et noir comme escouvillon; Il n'a tente ne pavillon Qu'il n'ait lessié a ses amis, Et n'a mais q'un peu de billon Qui sera tantost a fin mis.

XXXVII 11